

Edvant l'dernière gaillette.

Ch'est un morciau d'carbon qu'in app'lot eun'gaillette,
El dernière armontée, à l'arrêt d'chés molettes.

Aujord'hui dins ch'musée ch'est eun'pièche historique ;
Luijante dins s'cache in verre, ch'est eun'saprée arlique !
Telle eun'rare estatue, al a tous les honneurs,
Noïée d'leumière qu'al est pa-dzous chés projecteurs.
D'vant elle freumant mes z'yux, el noir invahit m'tiête,
El noir, couleur d'chés mineurs, pas eun'couleur ed fiête.
Busiant à l'dernière balle, i m'arvient des souv'nirs
Qui chagrin't em pinsée, m'font pousser des soupirs :

Nou viux pays minier, in l'traitot d'pays...noir,
Aveuc tous ses terrils, chés montanes ed terre...noire.
Quand l'mineur déchindot dins s'n'univers tout...noir,
Pindant huit heures ed long i-ouvrot dins l'pourrette...noire.
Trop souvint machuqué par des cops d'caillaux...noirs,
Sin corps i-a té tatoué par autant d'médalles...noires.
I-a d'ma pou respirer, vu qu'ses poumons sont...noirs ;
Es fimme devra trop vite, arsortir es rope...noire,
Pou m'ner, in soumaquant, à sin dernier tro...noir,
Es n'homme silicosé qu'in surnommot « gueule...noire ».

Ah ! Carbon, noir trésor muché in profondeur,
Pour aller t'désaquer 'n'a fallu del sueur !
Carbon, pou faire ronfler étufes et cuijinières,
T'as coûté quer in pleurs, in malheurs, in misères !
Carbon, qui-a fait finquer chés quéminées d'usines,
Pour ardrécher l'pays après d'z'années d'famine,
T'as été comme in dit el'pain d'nous z'industries.
Mais...ch't'à vous z'aut'mineurs qu'in dot crier « merci » !
Symbole ed nou passé, qu'i faut graver dins s'tiête,
Ch'est un morciau d'carbon qu'in app'lot eun'gaillette.

Jean-Marie CERF
Noyelles-sous-Lens